

Ա. Ս. ԳՐԻԲՈՅԵՂՈՎԻ ՀԱՐԱԲԵՐՈՒԹՅՈՒՆՆԵՐԸ Ա. Պ. ԵՐՄՈՒՆՈՎԻ ԵՎ Ի. Ֆ. ՊԱՍԿԵՎԻՉԻ ՀԵՏ 1826-1828 թթ. ՈՌԻՍ - ՊԱՐՍԿԱԿԱՆ ՊԱՏԵՐԱԶՄԻ ԺԱՄԱՆԱԿ ՄԻՆԶԵՐՈՐՐԴԱՅԻՆ ՈՌԻՍ ՊԱՏՄԱԳՐՈՒԹՅԱՆ ՂԱՅԱՏՄԱՍԸ

1826-1828թթ. ռուս-պարսկական պատերազմի առավել կարևոր հիմնահարցերից մեկն այդ պատերազմին Ա. Ս. Գրիբոյեդովի մասնակցության, նրա ծավալած ակտիվ դիվանագիտական գործունեության հարցն է:

Ուշագրավ է, որ մինչխորհրդային շրջանի համարյա բոլոր հեղինակներն էլ, բացասական վերաբերմունք ունենալով Ա. Ս. Գրիբոյեդովի նկատմամբ, նրա՝ դեկաբրիստների նկատմամբ ունեցած համակրական վերաբերմունքի և ազատամիտ գաղափարների պատճառով, այնուամենայնիվ բարձր են գնահատում նրա գործունեությունը Կովկասում և մասնավորապես նրա դիվանագիտական առաքելությունը 1826-1828թթ. ռուս-պարսկական պատերազմի և դրան հաջորդող իրադարձությունների ընթացքում:

Այդ հեղինակների մեծ մասը համակարծիք է նրանում, որ ցարիզմի հենարանը հանդիսացող Կովկասյան կորպուսի առավել աչքի ընկնող գործիչներ Ա. Պ. Երմոլովը և Ի. Ֆ. Պասկևիչը, չնայած միմյանց հանդեպ ունեցած հաճախ անսրող առեւտրային ու հակամարտությանը, բարձր են գնահատել հաջորդաբար իրենց ենթակայության տակ ծառայած Ա. Ս. Գրիբոյեդովի դիվանագիտական ունակություններն ու տաղանդը՝ նրան վստահելով ամենադժվարին ու խճողված, միայն արևելյան դիվանագիտությանը հատուկ բազմաբարդ պրոբլեմների լուծումը:

Մինչխորհրդային հեղինակների մեծ մասն իրենց տեսակետները հաստատելու համար լայնորեն վկայակոչում են բուն սկզբնաղբյուրները՝ Ա. Ս. Գրիբոյեդովի նոթերը, Ա. Պ. Երմոլովի և Ի. Ֆ. Պասկևիչի նամակներն ու զեկուցագրերը, պատերազմի անմիջական մասնակիցների հուշերն ու բազմաթիվ արխիվային տվյալներ:

Կովկասում Ա. Ս. Գրիբոյեդովի ծավալած գործունեության լուսաբանմամբ հանգամանորեն զբաղվել է Ա. Պ. Բերժեն, որն իր "А. С. Гривоедов на Кавказе (1818-1829гг)" ¹ աշխատության մեջ, օգտագործելով բազմաթիվ արխիվային փաստաթղթեր ու վավերագրեր, ըստ ամենայնի ներկայացրել է Ա. Ս. Գրիբոյեդովի գործունեության առանձին դրվագները վերոհիշյալ պատմա-

¹ А. П. Берже, А. С. Гривоедов на Кавказе. Кавказский вестник, 1900 N 6, 7, 8, 9.

փուլում, մասնավորապես նրա փոխհարաբերությունները Ա. Պ. Երմոլովի և Ի. Ֆ. Պասկևիչի հետ, նրա դիվանագիտական ողիսականն ու մտքական հանգամանքները: Ա. Պ. Բերժեն իրավացիորեն նշում է, որ առաջին իսկ հանդիպումից Ա. Պ. Երմոլովը բարձր է գնահատել Ա. Ս. Գրիբոյեդովի դիվանագիտական կարողությունները: Ապացույցն այն է, որ երբ վերջինս 1821թ. Պարսկաստանից Թիֆլիս վերադառնալիս վնասել էր ձեռքը և խնդրում էր իրեն ազատել Պարսկաստանում դիվանագիտական գործունեությունից, Ա. Պ. Երմոլովը հասնում է նրան, որ ծառայության մեջ Ա. Ս. Գրիբոյեդովի աստիճանը բարձրացնում են և նա մնում է Թիֆլիսում՝ որպես նրա անձնական քարտուղար, ընդ որում նույն Երմոլովի միջնորդությամբ էլ Ա. Ս. Գրիբոյեդովը պարզևատրվում է²:

Թե ինչպիսի ջերմ վերաբերմունք ուներ Կովկասի կառավարչապետ Ա. Պ. Երմոլովը դեպի Ա. Ս. Գրիբոյեդովը, և թե ինչպես էր գնահատում նրա անձնական հատկանիշները, գրողի և դիվանագետի տաղանդը, հաստատվում է նրանով, որ երբ նա ստանում է դեկաբրիստների հետ կապերի մեջ կասկածյալ Ա. Ս. Գրիբոյեդովին ձերբակալելու հրամանը, վտանգելով սեփական հեղինակությունն ու պաշտոնական դիրքը, իր մոտ է կանչում Ա. Ս. Գրիբոյեդովին և խորհուրդ տալիս շատ կարճ ժամկետում ոչնչացնել նրան վարկաբեկող բոլոր թղթերը: *«Գնա տուն և այրի՛ր այն ամենը, ինչը քեզ կարող է վարկաբեկել: Ընտևի՛ց ուղարկել են, և ես կարող եմ քեզ տալ մեկ ժամ ժամանակ...»*³:

Միաժամանակ ինքը՝ Ա. Պ. Երմոլովն իր անձնական պատասխանատվությամբ Գլխավոր շտաբի պետ բարոն Ի. Ղիբիչին գրում է, որ Ա. Ս. Գրիբոյեդովին ձերբակալել է անհապաղ⁴:

Ա. Պ. Երմոլովի այդ բարյացակամ վերաբերմունքի շնորհիվ Ա. Ս. Գրիբոյեդովին հաջողվում է ազատվել բոլոր վարկաբեկող թղթերից, ոստիկանության ձեռքն են ընկնում սոսկ Գրոգնիում եղած թղթերը: Չորս ամիս կալանքի տակ գտնվելուց հետո միայն Ա. Ս. Գրիբոյեդովն ազատվում է՝ *«Հանցանշանների բացակայության»* պատճառով⁵:

Այս միջադեպն առավել համոզիչ և հանգամանորեն է շարադրված գեներալ Դենիս Դավիդովի մոտ:

«Ա. Ս. Գրիբոյեդովը «խելքից պատուհաս» կոմեդիայի հռչակավոր հեղինակը բավական երկար ժամանակ ծառայում էր Ա. Պ. Երմոլովի մոտ, որը նրան սիրում էր ինչպես իր որդուն: Գնահատելով Գրիբոյեդովի գրական ծիրքերը, բայց գտնելով, որ նա բավականաչափ ընդունակ չէ ծառայության գործերը

² А. П. Берже, указ. соч. N 7, стр. 38, 42-43.

³ А. П. Берже, указ. соч. "Кавказский вестник", 1900, N 8, стр. 38.

⁴ Նույն տեղում, էջ 39:

⁵ Նույն տեղում, էջ 39:

վարելու համար կամ ավելի ճիշտ՝ շատ քիչ եռանդ է ցուցաբերում դեպի ծառայության գործերն ու դրանք չի սիրում, երմուլովը նրան երկարատև արծակուրդներ է տալիս, մի բան, որն ինչպես հայտնի է նա չէր սիրում անել այն չինովնիկների նկատմամբ, որոնք զուրկ չէին ձիրքերից ու եռանդից: Դեկտեմբերի 14-ի դեպքից հետո երմուլովը ստացավ բարձրագույն հրաման՝ ձերբակալել Գրիբոյեդովին, գրավել նրա բոլոր թղթերը և սուրհանդակի հետ ուղարկել Պետերբուրգ ... Գրիբոյեդովը, որին ամեն ինչի մասին նախազգուշացրել էր երմուլովի աղյուստանոտ Տալիզինը, այրեց կասկածելի բովանդակություն ունեցող բոլոր թղթերը: Մի քանի ժամից հետո փոխգնդապետ Միշչենկոն ուղարկվեց նրա բնակարանը՝ խուզարկություն կատարելու և Գրիբոյեդովին ձերբակալելու համար, բայց նա, կատարելով երկրորդը, գտավ միայն մի մոխրակույտ, որը ցույց էր տալիս, թե Գրիբոյեդովն իր փրկության համար ձեռք է առել բոլոր անհրաժեշտ միջոցները: Երմուլովը Գրիբոյեդովի նկատմամբ իր, կարելի է ասել հայրական հոգատարությունն այն աստիճանի հասցրեց, որ նրա համար միջնորդություն հարուցեց ռազմական մինիստր Տատիշչևի առաջ»⁶:

Իր հերթին, Ա. Ս. Գրիբոյեդովը չափազանց բարձր էր գնահատում Ա. Պ. երմուլովի ռազմական տաղանդը և անչափ ուրախ էր նրա մոտ ծառայելու համար: Իր «Ճանապարհորդական նոթեր»-ում Ա. Ս. Գրիբոյեդովը դեռ 1819թ. բազմաթիվ սիրալիիր խոսքեր էր շռայլում իր նկատմամբ բարյացակամ տրամադրված Կովկասի կառավարչապետի հասցեին: «Ի դեպ նրա (երմուլովի – Վ. Ս.) մասին. Ի նչ պատվական մարդ է դա. քիչ է ասել, թե խելացի է, հիմա ամենքն էլ խելացի են, բայց բոլորովին ռուսական ծնով, ամեն ինչի պիտանի է, ոչ միայն մեծ գործերի, ոչ միայն մանրուքների համար. լավ նկատիր սա: Դրա հետ և անսահման պերճախոսություն, և ոչ թե այժմյան բեկբեկուն, կցկտուր նապոլեոնյան ճոռոմաբանությունը. նրա խոսքերը թեկուզ անմիջապես զրի առ: Սիրում է շատ խոսել, բայց և այնպես ուրիշներին էլ թույլ է տալիս խոսել. երբեմն (ո՛վ մեղք չունի) շատ է խոսում այնպիսի բաների մասին, որոնք քիչ է հասկանում. բայց այդ ժամանակ էլ, եթե չհամոզվի՝ այնուամենայնիվ ստիպում է լսել իրեն: Այդ դեպքերը լավ են ես հիշում, որովհետև նրա հետ շատ էի վիճում՝ իհարկե այն մասին, ինչին հաստատ հավատացած էի, այլ կերպ չէր

կարող լինել. սակայն ոչ մի անգամ հաղթանակ չտարա. զուցե և ուղղել: Ամեն օր տեսնում էի նրան. մի քանի ժամ միասին էինք անցկացնում, և հարմար պահերին՝ մի քիչ նրան ճանաչելու համար: Նա Թիֆլիս էր եկել հանգստա-

⁶ Դենիս Դավիդով. «Ռազմական հուշեր» թարգման Դ. Սազմանյանի, Հայպետհրատ, Երևան, 1942թ. էջ 522-523:

նալու՝ չեռնցիների դեմ վարած արշավանքից հետո, որը մարտին նորից է ձեռնարկուս...»⁷:

Բայց Ա. Ս. Գրիբոյեդովի բնութագրմամբ Ա. Պ. Երմոլովը միայն խելացի և սիրալիր զրուցակից չէր, որի հետ կարելի էր բանավիճել բազմաթիվ հարցերի շուրջ: Ըստ նրա կերտած դիմանկարի՝ Ա. Պ. Երմոլովը նաև դաժան և անողոր բռնակալ էր, որը կանգ չէր առնում ոչ մի միջոցի առաջ՝ իրեն համծնված երկրամասը հպատակեցնելու համար: «Պետք է տեսնել ու լսել թե ինչպես է նա հավաքում Կովկասի այն կողմի կաբարդինյան և այլ իշխաններին. վարժ թարգմանների միջոցով, որոնք չեն համարժակվում բաց թողնել նրա մի բառն անգամ, այնպես է նա ահաբեկում ունկնդիրների երևակայությունը մահակով, կախաղանով, ամեն տեսակ մահապատիժներով, հրդեհներով. սա խոսքով, իսկ գործով նմանապես հանդարտեցնում է անհնազանդներին՝ զենքի դիմելով, կախում, հրկիզում է նրանց գյուղերը – ի՞նչ արած»⁸:

Ա.Պ. Երմոլովը ցարիզմի գաղութային քաղաքականության հետևողական իրագործողն էր, պետերբուրգյան արքունիքի իւլու կամակատարը, որի դաժան գործողությունները, երբեմն համիրավի, արդարացնում էր Ա. Ս. Գրիբոյեդովը:

Բաժանելով Դենիս Դավիդովի կարծիքը՝ համոզված ենք, որ Ա. Ս. Գրիբոյեդովի հարգանքը Ա. Պ. Երմոլովի նկատմամբ պետք է բացատրել ոչ միայն դեպի նրա ռազմական տաղանդը տածած համակրանքով, այլև նրանով, որ Ա. Պ. Երմոլովը, Ա. Ս. Գրիբոյեդովի մեջ բարձր գնահատելով առաջին հերթին գրողին, հնարավորություն էր տալիս նրան ազատ լինել դիվանագիտական գործերից և ժամանակի մեծ մասը հատկացնել գրական պարապմունքներին:

Այսուհանդերձ, համակարծիք չենք Դ. Դավիդովի հետ, որը փոքր-ինչ միտումնավոր է գնահատում Ա. Պ. Երմոլովի վերաբերմունքը Ա. Ս. Գրիբոյեդովի գործունեության վերաբերյալ, գտնելով, որ Ա. Պ. Երմոլովը համոզված էր, թե Ա. Ս. Գրիբոյեդովը «բավականաչափ ընդունակ չէ ծառայության գործերը վարելու, կամ ավելի ծիշտ շատ քիչ եռանդ է ցուցաբերում ծառայության գործերի նկատմամբ, քանի որ դրանք չի սիրում...»:

Կարծում ենք, որ մի բան է «ընդունակ չէ», այլ բան՝ «քիչ եռանդ է ցուցաբերում»: Ակամայից դա հաստատում է ինքը՝ Դ.Դավիդովը: Դիվանագիտությանն անհրաժեշտ ծառայար լեզուն. օտար լեզուների իմացությունը, սառնասրտությունը, խառնվածքի հակասականությունն Ա. Ս. Գրիբոյեդովի բարենասանություններից էին: Այնպես որ Ա. Ս. Գրիբոյեդովին դիվանագիտական

⁷ Ա. Ս. Գրիբոյեդով - «Ճանապարհորդական նոթեր» Կովկաս-Պարսկաստան. Թարգման. Դ. Ենիկոլոպովի, կազմված և ծանոթագրած հրատարակությունից: Դայպետիրատ, Երևան, 1945թ. էջ 11:

⁸ Նույն տեղում, էջ 12:

տաղանդի բացակայության մեջ մեղադրելը սխալ է: Շատ ավելի ճիշտ է այն, որ գրական զբաղմունքները Ա.Ս. Գրիբոյեդովը գերադասում էր դիվանագիտականից, ուստի ավելի քիչ եռանդ էր դրսևորում դրանց կատարման համար:

Ա.Պ. Երմոլովը չէր կարող Ա.Ս. Գրիբոյեդովին մեղադրել դիվանագիտական ունակությունների բացակայության մեջ, քանզի բազմիցս համոզվել էր, թե ինչպիսի եռանդով և հետևողականությամբ է Ա. Ս. Գրիբոյեդովը ձեռնամուխ լինում իրեն տրված դիվանագիտական հանձնարարությունների կատարմանը: Այդ հարցում, ըստ մեզ, միանգամայն իրավացի է Վ. Պոտտոն, որը, բարձր գնահատելով Ա. Ս. Գրիբոյեդովի դիվանագիտական գործունեությունը, գրում է. «*Հատկապես նրա (Ա.Ս. Գրիբոյեդովի – Վ.Ս.) էներգիային և հետևողականությանն է, օրինակի համար պարտական երմոլովը, որ պարսիկները համաձայնվեցին ազատել բոլոր ռուս զերհներին, որոնք գտնվում էին գերության մեջ Ցիցիանովի ժամանկներից սկսած*»⁹:

Չպետք է մոռանալ, որ Ա.Պ. Երմոլովը երկար տարիներ գտնվելով Կովկասում, քաջածանոթ էր արևելյան բարբերին և ինքն էլ փայլուն դիվանագետ էր: Նախ՝ Ա.Պ. Երմոլովը, եթե ցանկանար էլ, չէր կարող իրեն հավասար դիվանագետ համարել Ա.Ս. Գրիբոյեդովին, երկրորդ՝ որ եթե այդ ունակությունների բացակայությունը տեսներ Ա. Ս. Գրիբոյեդովի մեջ, կաշխատեր օր առաջ ազատվել նրանից: Իսկ այն հանգամանքը, որ Ա. Պ. Երմոլովը շատ ժամանակ էր տալիս Ա.Ս. Գրիբոյեդովին՝ զբաղվելու գրական գործունեությամբ, թերևս խոսում այն մասին, որ Կովկասի հռչակավոր նվաճողը հանձին Ա.Ս. Գրիբոյեդովի առաջին հերթին տեսնում էր տաղանդավոր գրողի, որի գրական ստեղծագործությունները շատ ավելի անհրաժեշտ էին Ռուսաստանին, քան նրա դիվանագիտական գործունեությունը:

Հարկ է նշել, որ Ի. Ֆ. Պասկևիչի Կովկաս ժամանելուց հետո Ա. Ս. Գրիբոյեդովը համարյա ժամանակ չունեի գրականությամբ զբաղվելու¹⁰ և, ինչպես նշում է Վ. Պոտտոն, իրեն, չարդարացված ձևով դնում էր կրակի տակ¹¹:

Անհրաժեշտ է նշել, որ իհարկե, Ի. Ֆ. Պասկևիչի՝ Կովկաս գալով Ա.Ս. Գրիբոյեդովի նշանակությունը ոչ միայն չնվազեց, այլև զգալիորեն բարձրացավ:

Որոշ հեղինակներ Ա. Ս. Գրիբոյեդովի ծառայությունը Ի. Ֆ. Պասկևիչի մոտ համարում են ուղղակի դավաճանություն Ա. Պ. Երմոլովի հանդեպ: Դեմիս Դավիդովը, որը Ա. Ս. Գրիբոյեդովին հրաշալի մարդ և գրող էր համարում, խիստ

⁹ В. Потто, "Кавказская война в отд. очерках, эпизодах, легендах и биографиях". Т. III. Персидская война 1826-1828 гг. СПб, 1886-1888 гг. стр. 606. Так же В. Потто, "Посольство и смерть Грибоедова. Грибоедов помощничий министр при персидском дворе". Стр 8

¹⁰ В. Потто, указ. соч. стр. 11.

¹¹ Նույն տեղում:

վիրավորված էր վերջինիս նմանօրինակ քայլից և այն համարում էր բացարձակ դավաճանություն Ա. Պ. Երմոլովի նկատմամբ:

«Պետերբուրգում, Գլխավոր շտաբում կարճ ժամանակ պահվելուց հետո Գրիբոյեդովն ազատվեց, պարզևատրվեց աստիճանով ու նորից ուղարկվեց Կովկաս: Այդ ժամանակից հսկայական փոփոխություն կատարվեց Գրիբոյեդովի մեջ, որին մինչ այդ մենք սիրում էինք որպես սրամիտ, ազնիվ և տաղանդավոր ընկերոջ: Իր սրտում խեղդելով երախտագիտության զգացումը դեպի իր բարերար Երմոլովը, նա կարծես թե Պետերբուրգում խոստում տվեց աջակցել կառավարությանը՝ միջոցներ փնտրելու և մեղադրելու այս արժանավոր մարդուն, որն իր նկատմամբ ատելություն էր առաջացրել նոր թագավորի մեջ ... Նա շատ մոտիկ հարաբերությունների մեջ մտավ Վանկա - Կայենի, այսինքն Կարգանովի (Կովկասյան կորպուսում հայ թարգմանիչ - Վ. Ս.) հետ, որն ամենաստոր մատնություններն էր հորինում Երմոլովի դեմ: Պասկևիչը, որի աչքում Գրիբոյեդովն այնքան անարժան եռանդ էր ցուցաբերում, նրա մասին միջոցորդություն հարուցեց թագավորի առաջ: Մեզ բոլորիս համար ցավալի էր հիասթափվել այդ շնորհալի գրողից և հրաշալի սրամիտ մարդուց, որը Պասկևիչի վրաստան գալուց հետո շուտով ինձ և Շիմանովսկուն ասաց հետևյալ խոսքերը. «Միթե դուք ուզում եք, որ այդ հիմարը, որին ես մոտիկից ծանաչում եմ (խոսքը Պասկևիչի մասին է - Վ. Ս.) հաղթանակ տանի Ռուսաստանի ամենախեղճ և ամենաբարեմիտ մարդկանցից մեկի դեմ (ակնարկում է Երմոլովին - Վ. Ս.). հավատացեք, որ մեր մարդը նրան կխաբի և Պասկևիչը, որ ժամանել է հեկհե, խայտառակ կերպով կմեկնի այստեղից»: Դրանից հետո շուտով նա ասում էր մեզանից շատերին. «Պասկևիչն անտանելի հիմար է, օժտված է միայն խոխոլներին հատուկ խորամանկությամբ: Նա չունի ոչ գիտելիքներ, ոչ համակրանք դեպի այն ամենը, ինչ-որ գեղեցիկ է ու վեհ, բայց այն հաջողությունների հետևանքով, որոնց վրա հույս դնելու իրավունք նա չունի և որոնցով պարտական է Երմոլովյան հիմնալի գործերին և ճարտար ու խիզախ Վեյսամիտովին ու Սադաթովին, նա շուտով կգրկվի և իր փոքրիկ բանականությունից»:

Բայց Գրիբոյեդովը միևնույն ժամանակ, ըստ երևույթին փառասիրությունից դրդված, գործադրում էր իր խելքն ու ընդունակությունները, որպեսզի ավելի ու ավելի արժանանար Պասկևիչի բարեհաճությանը, իսկ Պասկևիչը նրա ազգականն էր՝ կնոջ կողմից»¹²:

¹² Դեմիս Դավիդով. «Ուղեգրական հուշեր», 1942թ. Երևան, 523-524, տես նաև «Грибоедов, его жизнь и творчество, в мемуарах современников» ред. Зип. Давидова, изд. «Красная газета», Л. 1929г., Դ. Զավալիշինի և Ե. Մուրավյով - Կարսկու հուշերը, էջ 80, 123

Ակնհայտ է, որ երկարաշունչ այս տողերը ոչ միայն մեկնաբանում են Ա. Ս. Գրիբոյեդովի՝ Ա. Պ. Երմոլովի հանդեպ կատարած «ղավաճանությունը», այլև, որոշ վերապահումներով, ճշմարտացիորեն տալիս Կովկասյան կորպուսի երկու նշանավոր զորահրամանատարների գնահատականը՝ որպես ռազմական ու պետական գործիչների: Բայց, եթե այդ երկու գործիչներին տրված Դ. Ղափիդովի գնահատականն ընդհանուր առմամբ համապատասխանում է պատմական իրականությանը, ապա նույնը չի կարելի ասել Ա. Պ. Երմոլովի հանդեպ Ա. Ս. Գրիբոյեդովի վերաբերմունքի և դրան՝ Դ. Ղափիդովի տված մեկնաբանության առնչությամբ:

Ամեն դեպքում չի կարելի համաձայնել Դենիս Ղափիդովի այն պնդմանը, թե Ա. Ս. Գրիբոյեդովը միջոցներ էր փնտրում մեղադրելու և վարկաբեկելու արժանավոր մարդուն՝ Ա. Պ. Երմոլովին:

Հանգամանքների բերումով ստիպված լինելով մնալ Կովկասում և ծառայության անցնել Ի. Ֆ. Պասկևիչի մոտ՝ Ա. Ս. Գրիբոյեդովը չէր կարող չգիտակցել, որ այդ քայլն իրեն կհեղինակագրկի նախկին բարերարի՝ Ա. Պ. Երմոլովի աչքում: Նա դրանում համոզվեց հետագայում Պետերբուրգում՝ արդեն պաշտոնագրկված Ա. Պ. Երմոլովի սառն ընդունելությունից: Խղճի խայթը տանջում էր Ա. Ս. Գրիբոյեդովին և թերևս դա էր պատճառը, որ անցնելով Մոսկվայով՝ նա իր բարկած Ստեփան Նիկիտիչ Բեգիչևին ասաց. «*Ես մշտական չարագործ եմ Երմոլովի նկատմամբ*»¹³: Սակայն մեջբերելով այս իրոք սրտաբուխ բառերը՝ Դ. Ղափիդովն իրեն իրավունք է վերապահում համիրավի կերպով մեղադրել այդ ժամանակի մեծ գրողին ու մեծ գործիչին: Այս հանգամանքը համահունչ չէ ճշմարտությանը:

Չէ՞, որ հենց ինքը՝ Դ. Ղափիդովը, բազմիցս շեշտում է Ա. Ս. Գրիբոյեդովի՝ դեպի Ա. Պ. Երմոլովը ունեցած անկեղծ հարգանքի ու նվիրվածության մասին (դրանում մեզ անվերապահորեն համոզում են Ա. Բեգիչևին ուղղված Ա. Ս. Գրիբոյեդովի նամակները)¹⁴:

Երբ Դ. Ղափիդովը խոսում է Ա. Պ. Երմոլովի և Ի. Ֆ. Պասկևիչի հանդեպ Ա. Ս. Գրիբոյեդովի վերաբերմունքի մասին, ստիպված է խոստովանել, որ վերջինս նախապատվությունը միշտ տվել է Ա. Պ. Երմոլովին: Նույնիսկ այն ժամանակ, երբ նախկին ժամիշխանավորը՝ Կովկասի երբեմնի ահեղ նվաճողը, պաշտոնագրկվել էր, ոչ մի դեր չէր կարող խաղալ Ա. Ս. Գրիբոյեդովի կարիերայում, Ա. Ս. Գրիբոյեդովը ջերմությամբ էր արտահայտվում նրա մասին, մինչդեռ հակառակը՝ բացեիքաց արհամարանքով էր խոսում Ի. Պասկևիչի մասին:

¹³ Դ. Ղափիդով, «Ռազմական հուշեր», Երևան, 1942թ., էջ 525

¹⁴ Ա. Ս. Գրիբոյեդով, «Ճանապարհորական նոթեր» Երևան, 1945թ. էջ 11-12:

Կարծում ենք, որ Դ. Դավիդովի մեղադրանքները Ա. Ս. Գրիբոյեդովի հասցեին՝ Ա. Պ. Երմոլովի հանդեպ ստոր դավաճանության և նրան վարկաբեկելու հարցում, միտումնավոր են:

«Գրիբոյեդովը, որ Թուրքմենչայի դաշնագրով զնացել էր թագավորի մոտ, առանց քաշվելու ասում էր ինձ, Շիմանովսկուն և ուրիշ շատերին. «Պասկևիչն այնքան անտանելի է, որ ես Վրաստան կվերադառնամ ոչ այլ կերպ, բայց եթե իբրև դեսպան պարսկական արքունիքին կից»»¹⁵:

Դիրքի կամ պաշտոնի հասնելու ձգտումը համարում ենք բնական երևույթ, սակայն այստեղ էականը ոչ թե այն էր, որ Ա. Ս. Գրիբոյեդովը ձգտում էր բարձր դիվանագիտական պաշտոնների, այլ Պասկևիչից անպայման հեռու լինելու ցանկությունը, մի համգամանք, որին ուշադրություն չի դարձրել 1812թ. հերոս պարտիզանը:

Միտումնավորություն ենք տեսնում նաև նրանում, որ Դ. Դավիդովը համենայնդեպս չի մտորում այն մասին, թե ինչպես կարող էր իրեն դրսևորել (ավելի ճիշտ՝ պետք է դրսևորեր) Ա. Ս. Գրիբոյեդովը Ի. Ֆ. Պասկևիչի ժամանելուց հետո և թե ինչ ճակատագիր կսպասվեր նրան, եթե ընդդիմանար Ի. Ֆ. Պասկևիչին: Կարծում ենք նաև, որ Ի. Ֆ. Պասկևիչի հարցում Դենիս Դավիդովը պետք է, որ նման մոտեցում դրսևորեր, որովհետև, վերջին հաշվով, վերջում ինքն էլ էր հայտնվել անբարեհամ վիճակում. նրանց ճակատագրերն ինչ-որ տեղ նման էին:

Ըստ մեզ միանգամայն իրավացի է Ա. Պ. Բերժեն, որ համամիտ չլինելով Դ. Դավիդովի հետ (վերջինս, ինչպես ասվեց, Ա. Պ. Երմոլովի հանդեպ Ա. Ս. Գրիբոյեդովի պահվածքը համարում է անշնորհակալ քայլ)՝ չի մեղադրում Ա. Ս. Գրիբոյեդովին՝ Ի. Ֆ. Պասկևիչի մոտ ծառայության անցնելու համար: Ա. Պ. Բերժեն դա համարում է Ա. Ս. Գրիբոյեդովի կողմից կատարված հարկադրական քայլ¹⁶:

1826-1828թթ. ռուս-պարսկական պատերազմը լուսաբանող մինչ-խորհրդային շրջանի պատմաբանների մեծ մասը, մեր կարծիքով, ըստ ամենայնի չեն լուսաբանել Ա. Ս. Գրիբոյեդովի նկատմամբ Ի. Ֆ. Պասկևիչի տածած բարյացակամ վերաբերմունքի բոլոր շարժառիթները: Ինչպես հայտնի է, 1826-1828թթ. պատերազմի ընթացքում Ա. Ս. Գրիբոյեդովը շարունակեց դիվանագիտական իր ծառայությունը և նույնիսկ զգալիորեն առաջ քաշվեց ինչը որոշ պատմաբաններ, մասնավորապես իշխան Շչերբատովը համարում

¹⁵ Դ. Դավիդով, նշվ. աշխատություն, էջ 525-526:

¹⁶ А. П. Берже, А. С. Грубоедов на Кавказе "Кавказский вестник" Тифлис, 1900г., N 9, стр. 30.

են մեծ բարերարություն Ա. Ս. Գրիբոյեդովի նկատմամբ և հակված են այն բացատրելու Ի. Ֆ. Պասկևիչի և Ա. Ս. Գրիբոյեդովի ազգակցությամբ¹⁷։

Ինչ խոսք, որ կնոջ կողմից ազգակցությունը որոշակի դեր խաղացել է բայց իրականում Ի. Ֆ. Պասկևիչի բարյացակամ վերաբերմունքը Ա. Ս. Գրիբոյեդովի հանդեպ պետք է բացատրել ոչ միայն ազգակցությամբ (Ա. Ս. Գրիբոյեդովը Ի. Պասկևիչի կնոջ զարմիկն էր — Վ. Ս), այլև առաջին հերթին Ի. Ֆ. Պասկևիչի անձնական շահերով։ Բազմիցս առիթ ենք ունցել համոզվելու, որ մինչխորհրդային շրջանի շատ հեղինակներ, չմեղանչելով պատմական իրականության դեմ, ստիպված են եղել ընդունել, որ թեև Ի. Ֆ. Պասկևիչն օժտված էր անձնական բացառիկ խիզախությամբ և քաջությամբ¹⁸, բայց որպես պետական և ռազմական գործիչ՝ միջակ և սահմանափակ ընդունակությունների տեր անձնավորություն էր (բացառությամբ՝ իշխան Շչերբատովի—Վ. Ս), որն ի վիճակի չէր հասկանալու սովորական ավանդույթներով դաստիարակված Կովկասյան կորպուսի զինվորների ոգին։ Նա խիստ նպատակասլաց էր իր գործողություններում և, չխորշելով ոչ մի ինտրիգից, ազատվում էր անցանկալի հակառակորդներից։ Նրա զխապտույտ հաջողություններն իր նախորդների աշխատանքի արդյունքն էին, ինչպես նաև ճակատագրի շնորհը։ ճակատագիրն, իրոք, առատածեռն եղավ Նիկոլայ Առաջինի նոր սիրելիի հանդեպ¹⁹։ Այս տեսակետից չափազանց հատկանշական են Դ. Դավիդովի՝ Ի. Ֆ. Պասկևիչին տրված բնութագրումները։

«Պասկևիչը հիանալի քաջությամբ հանդերձ՝ օժտված չէ սրատեսությամբ, ոչ վճռականությամբ, ոչ ինքնուրույնությամբ, որ հատուկ են միայն բարձր խարակտերներին։ Աչքի չընկնելով ոչ ոգու մի առանձին կայունությամբ, ոչ պերճախոսությամբ, ոչ թղթի վրա իր մտքերը շարադրելու ընդունակությամբ, ոչ սիրալիք վարմունքով սրտեր գրավելու կարողությամբ և ոչ էլ գիտության որևէ ծյուղից տեղեկություններ ունենալով, նա ի վիճակի չէր ըմբռնելու զինվորների ոգին և այս պատճառով երբեք չի կարող տիրանալ նրանց սրտերին։ Ներկայումս ստորաբարձ շողոքորթների ամբողջները փառաբանում են թագավորի այդ սիրելիին ու խորհրդականին, նրան վերագրելով այնպիսի հատկություններ ու արժանիքներ, որոնք նրա մեջ առաջ ոչ ոք երբեք չէր նկատել։ Պասկևիչը մինչև քառասուն հինգ տարեկան հասակը համարվում էր քաջ, բայց և խիստ սահմանափակ մի մարդ նույնիսկ իր ընտանիքում ...

¹⁷ «Генерал — фельдмаршал князь Паскевич. Его жизнь и деятельность». По извещ. источникам составил. Ген. Штаба генерал — майор князь Шербатов. II том, СПб 1889г., т. VU, стр. 248 — 249, III том, 1890г., т. II, стр. 95.

¹⁸ Դա նշում են Վ. Պոտտոն, Դ. Դավիդովը, Շչերբատովը և ուրիշներ։

¹⁹ В. Потто, «Кавказская война» том. 3, стр. 178.

Լինելով սոսկ միջակ խելքի տեր, նա իր բոլոր հայրենակիցների, մալոռուսների նման արտասովոր կերպով խորամանկ է և այս պատճառով ամենայն իրավամբ կարող է անվանվել անդրդնեպրյոսն իտալացի... Գրիբոյեդովի նախագուշակությունները կատարվեցին. Պասկևիչի գոռոզությունը, հպարտությունը, անձնապատասխանությունը սահման չունի, Պասկևիչի, որի գլուխը բոլորովին պտտվում է հաջողություններից ու մեծարանքներից. նա իրեն համարում է մեծ մարդ և ժամանակակից առաջին գորավար...»²⁰:

Ճակատագրի շնորհի առիթով Դ. Պավլոգովը գրում է. «Մի անգամ շոդոբորթները նրա (Պասկևիչի – Վ. Ս.) հոր, Ֆյոդոր Գրիգորևիչ Պասկևիչի հետ խոսելիս բացականչեցին. «Վարչական իշխանը (Պասկևիչը – Վ. Ս.) հանճար է»: Խելոք ծերունին մալոռուսերեն լեզվով առարկեց. «Հանճարը հանճար չէ, բայց որ բախտը բերում է, բերում է»²¹:

Ինչպես Դ. Պավլոգովը, այնպես էլ մինչխորհրդային շրջանի ողուս և հայ շատ հեղինակներ շեշտում են, որ Ի. Ֆ. Պասկևիչի գրիչն աչքի չէր ընկնում պերճախոսությամբ և փայլուն կերպով գրված նրա շատ էջերն արդյունք էին ուրիշի՝ առաջին հերթին Ա. Ս. Գրիբոյեդովի տքնաջան աշխատանքի²²:

Լիովին համակարծիք լինելով Դ. Պավլոգովի և Վ. Պոտտոյի հետ՝ Ի. Ֆ. Պասկևիչի բնութագրության հարցում, միաժամանակ գտնում ենք, որ Ա. Ս. Գրիբոյեդովի առաջընթացը ծառայության մեջ պետք է բացատրել ոչ միայն Ի. Ֆ. Պասկևիչի մատուցած օժանդակությամբ, այլև Ա. Ս. Գրիբոյեդովի դիվանագիտական լուրջ ընդունակություններով, որոնցում Ի. Ֆ. Պասկևիչը ևս, Ա. Պ. Երմոլովի նման, բազմիցս առիթ է ունեցել համոզվելու: Պատահական չէր, որ նա Արտաքին գործոց նախարար կոմս Նեսելրոդին խնդրում էր Ա. Ս. Գրիբոյեդովին թողնել իր մոտ ծառայության²³:

Համոզված ենք, որ Ա. Ս. Գրիբոյեդովի դիվանագիտական ընդունակությունները Ի. Ֆ. Պասկևիչին պետք էին այնքանով, որքանով նպաստում էին նրա անձնական փառքի բազմապատկմանը: Ի. Ֆ. Պասկևիչը Ա. Ս. Գրիբոյեդովի հետ վարվում էր այնպես, ինչպես իր մյուս բոլոր ստորադրյալների հետ: Թերևս դրանով պետք է բացատրել այն համգամանքը, որ քաջ գիտակցելով, թե ինչպիսի վախճան կարող է սպասել Ա. Ս. Գրիբոյեդովին, Ի. Ֆ. Պասկևիչը վերջինիս չարգելեց մեկնել Թեհրան՝ բացահայտ մահվան գիրկը:

Սրանով, կարծում ենք, բացառվում են ազգակցական կապերի առաջնահերթության մասին տեսակետները:

²⁰ Դ. Պավլոգով, «Ուղեգրական հուշեր» Երևան, 1942թ., էջ 528 - 529:

²¹ Նույն տեղում, էջ 529 - 530:

²² В. Потто, "Посольство и смерть Гринева" стр. 11.

²³ АКАК, том VII, стр. 539 - 540, Тифлис 1888г.

Ամփոփելով ասվածը, մենք գտնում ենք, որ պետք է նշել մի շարք գործոններ ևս, որոնք նպաստեցին Կովկասում Ա. Ս. Գրիբոյեդովի մնալուն և Ի. Ֆ. Պասկևիչի մոտ ծառայության անցնելուն:

1. «Խելքից պատուհաս» պիեսի և դեկաբրիստական ապստամբությանն առնչվելու հետ կապված՝ Պետերբուրգի պաշտոնական շրջաններում և բարձր հասարակության մեջ Ա.Ս. Գրիբոյեդովի նկատմամբ անվստահության մթնոլորտը շարունակվում էր, ուստի վերջինս գերադասում էր մնալ Կովկասում և կյանքը վտանգել զնդակների տակ (ինչպես գրում է Ի. Ֆ. Պասկևիչն իր կնոջը՝ Ա. Ս. Գրիբոյեդովի զարմուհուն)²⁴, քան, առաջին հերթին, գրողի փառք ստեղծել Պետերբուրգում՝ իր համար անբարյացական մթնոլորտում: Իսկ գրական սալոններում, ուր նրա երկը, դեռ չտպագրված, ծեռքից ծեռք էր անցնում, նա ինչքան էլ ցանկանար, միևնույն է, միայն կարող էր երկրորդը լինել, քանի որ ռաջնության դափնին, իրավամբ, պատկանում էր մյուս Ալեքսանդր Սերգեևիչին՝ Սեծն Պուշկինին:

2. Որոշակիորեն, զոհն իր առաջադեմ գաղափարներով սերտորեն կապված լինելով շատ դեկաբրիստների հետ, ամիսներ անցկացնելով Գլխավոր շտաբի արգելասենյակում՝ Ա. Ս. Գրիբոյեդովը մոտիկից տեսել է այն ծաղրալից վերաբերմունքն ու կամայականությունը, որ դրսևորում էր Յետաքննող հանձնաժողովը հարցաքննվող դեկաբրիստների նկատմամբ: Նրան թերևս դժվար կլիներ մնալ այնտեղ (Պետերբուրգում – Վ. Ս.), ուր ի կատար էր ածվել նշանավոր դեկաբրիստների մահապատիժը: Ատելությունն ու արհամարանքը Նիկոլայ Առաքինի և նրա արքունիքի հանդեպ, ինչո՞ւ չէ, նաև անձնապաշտպանության բնագոյը, նրան թելադրեցին շուտափույթ հեռանալ մայրաքաղաքից:

3. Բարձրաշխարհիկ ընտիր հասարակությունից կապերը խզելու և մայրաքաղաքից միառժամանակ հեռանալու վճիռը բացատրել կարելի է նաև այն հանգամանքով, որ Ա. Ս. Գրիբոյեդովը քաջ գիտակցում էր, որ գտնվելով Կովկասյան կորպուսում, իր ունեցած բազմաթիվ ազդեցիկ կապերի շնորհիվ կարող էր մեծ օգնություն ցույց տալ դեկաբրիստներին հարած, հետո աստիճանագրկված ու Կովկաս աքսորված շատ անձանց:

Պատահական չէ, որ Կովկաս աքսորված դեկաբրիստներից շատերը ջերմ հարաբերություններ ունեին Ա. Ս. Գրիբոյեդովի հետ՝ նրան համարելով իրենց մարդը և անհրաժեշտության դեպքում դիմում էին նրան:

4. Կովկասում Ա. Ս. Գրիբոյեդովի մնալու ամենակարևոր պատճառներից մեկն էլ այն էր, որ նա սերտորեն կապված էր Անդրկովկասի, մասնավորապես

²⁴ “Беседы в обществе любителей российской словесности” М., 1868г., вып. II, стр. 26. (Սեքերված Վ. Ս. Պարսամյանի «Գրիբոյեդովը և իայ-ռուսական հարաբերությունները», Երևան 1947թ. աշխատության մեջ, էջ 62):

Թիֆլիսի հայկական, վրացական առաջավոր շրջանների հետ, որոնցից շատերի տների մշտական հյուրն էր, հասարակության սիրելին²⁵:

5. Կա մի հանգամանք ևս, որին նույնպես պետք է ուշադրություն դարձնել: Լինելով աղքատացած ազնվականական ընտանիքի զավակ, չունենալով նյութական շոտյ միջոցներ՝ Ա. Ս. Գրիբոյեդովը ստիպված էր դիվանագիտական կորպուսում կատարած իր համեստ աշխատանքով (նա կոլեգիական ասսեսոր էր – Վ. Ս.) հոգալ ոչ միայն իր, այլև հարազատների նյութական կարիքները: Լինելով փայլուն կրթության տեր, տիրապետելով լեզուների՝ նա Կովկասում և Պարսկաստանում կարող էր արագորեն հաջողության հասնել և իր համար ստեղծել նյութական բարեկեցություն: Բայց նույնիսկ այդ դեպքում, երբ նրա համար ապահովված էր Ի. Ֆ. Պասկևիչի հզոր հովանավորությունը, Թուրքմենչայի պայմանագիրը Պետերբուրգ տանելուց հետո նա գերադասեց մեկնել Թեհրան, քան մնալ գործող Կորպուսում՝ իր հզոր ազգականի խնամակալության տակ, որի արատներն ու սահմանափակությունը բազմիցս ստիպված էր ընդգծել:

6. Նշենք, նաև որ Ա. Ս. Գրիբոյեդովի «դավաճանությունը», ծառայությունը Ի. Ֆ. Պասկևիչի մոտ կարելի է բացատրել նաև Ա. Ս. Գրիբոյեդովի անձանական որոշ հատկանիշներով՝ ոգու անկայունությամբ, փառասիրությամբ, կարիերիզմով, անհաստատ բնավորությամբ, որոնք դիվանագետին բնորոշ հատկանիշներ են, այսպես ասած՝ «մաքիավելիական առաքինություններ», որոնց մասին, դեռ ժամանակին, ընդգծել են Ա. Ս. Գրիբոյեդովի ժամանակակիցները²⁶: Այդ հատկանիշները, ինչ խոսք, որոշակի դեր են խաղացել Ա. Ս. Գրիբոյեդովի և վերելքի և անկման համար. մի հանգամանք, որն այժմ լայնորեն մեկնաբանվում է ժամանակակից պատմագրության կողմից²⁷:

²⁵ А. П. Берге. “Грибоедов на Кавказе” (1818-1819гг.). Кавказский вестник, “Тифлис” 1900 N 7, стр. 29-31.

²⁶ “Грибоедов, его жизнь и гибель в мемуарах современников”, Л. 1929г. (Ս. Լ. Բեգիշևի, Ն. Վ. Շիմոնովսկու Դ. Ի. Չավաիշինի, Ն. Մուրավյով – Կարսկու վկայությունները)

²⁷ В. Ярхо – “Грибоедов и свиухи” Журнал “Огонек”. Еженедельник N 47, 25.11.02, стр. 28-31.

Ю. Прохоров - “Неизвестный Грибоедов” Журнал “Простор”, N 7, 26.08.2002.

Цимбаева Е. Н. - “Грибоедов” М. Молодая гвардия, 2003г., 545 стр.

Княпина Н. С. (докт. проф. МГУ) – “Внешняя политика Николая I” М. “Новая и новейшая история” NN1,2, 2001г.

Тютчева А. Ф. “При дворе двух императоров”. М. 1990г.

Интернет. Литературное творчество ученых. “Жизнь и смерть А. Грибоедова” Счастливый год 2004г.